



KENYATAAN MEDIA

KEMENTERIAN PERDAGANGAN DALAM NEGERI
DAN KOS SARA HIDUP

No. 13 Persiaran Perdana, Presint 2,
62623 Putrajaya

No. Telefon : 03-8882 5562
No. Fax : 03-8882 5569

OPS TIRIS 3.0 – DUA WARGA ASING DITAHAN SELEWENG LPG

PUTRAJAYA, 12 SEPTEMBER 2024 – Kementerian Perdagangan Dalam Negeri dan Kos Sara Hidup (KPDN) telah menyerbu sebuah premis tanpa nama di Green Technology Park, Seremban 2, Negeri Sembilan yang disyaki dijadikan stor haram tempat menyimpan dan mengedar gas petroleum cecair (LPG) pada 4 September 2024.

Serbuan yang dilakukan oleh sepasukan anggota penguat kuasa KPDN Putrajaya bermula kira-kira jam 11.00 pagi itu adalah hasil risikan yang telah dilakukan oleh pihak KPDN beberapa hari sebelum operasi dilancarkan.

Hasil pemeriksaan ke atas premis terbabit, pasukan serbuan telah menemukan sejumlah LPG di dalam premis itu bersama beberapa peralatan lain yang dipercayai digunakan dalam aktiviti *decanting* iaitu memindahkan gas daripada tong berkapasiti 14kg bersubsidi kepada tong berkapasiti 50kg untuk kegunaan industri. Hasil pemeriksaan lanjut, premis itu juga tidak mempunyai dokumen yang sah di bawah Akta Kawalan Bekalan 1961 [Akta 122] untuk menjalankan urusan berkaitan barang kawalan.

Sejumlah 98 unit tong gas pelbagai jenama berkapasiti 14kg dan 50kg, sebuah lori, paip getah penyambung serta beberapa dokumen perniagaan lain yang turut ditemui telah disita bagi siasatan lanjut di bawah Akta 122. Nilai keseluruhan rampasan dianggarkan berjumlah RM41,531.60.

Ketika serbuan dilakukan, dua individu warga asing, dipercayai pekerja di premis terbabit telah ditahan bagi membantu siasatan.

Kertas siasatan telah dibuka dan siasatan lanjut ke atas kes ini sedang dilakukan di bawah Akta Kawalan Bekalan 1961 [Akta 122] bagi mengenal pasti individu/syarikat lain yang terlibat dalam aktiviti ini serta rangkaian pengedaran LPG tersebut.

KPDN ingin memberikan amaran keras kepada mana-mana pihak yang berkaitan agar sentiasa mematuhi perundangan yang telah ditetapkan. Mana-mana orang yang melakukan kesalahan boleh diambil tindakan di bawah Akta 122 dan jika disabitkan boleh didenda tidak lebih RM1,000,000.00 (Ringgit Malaysia Satu Juta) manakala bagi kesalahan berikutnya tidak melebihi RM3,000,000.00 (Ringgit Malaysia Tiga Juta) bagi orang perseorangan atau penjara tidak melebihi tiga tahun atau kedua-duanya sekali manakala bagi syarikat sekiranya sabit kesalahan boleh didenda tidak melebihi RM2,000,000.00 (Ringgit Malaysia Dua Juta) manakala bagi kesalahan berikutnya tidak melebihi RM5,000,000.00 (Ringgit Malaysia Lima Juta).

Selain itu, syarikat ini juga akan disiasat di bawah Akta Pencegahan Pengubahan Wang Haram, Pencegahan Pembiayaan Keganasan dan Hasil Daripada Aktiviti Haram 2001 (AMLATFPUAA 2001) [Akta 613] iaitu kesalahan pengubahan wang haram bagi tujuan mengesan, membeku, menyita serta sehingga ke peringkat perlucutan hak ke atas apa-apa hasil pendapatan atau harta yang dijana daripada aktiviti haram penyelewengan berkaitan gas petroleum cecair.

Jika disabitkan dengan kesalahan di bawah Akta 613 ini boleh dipenjarakan selama tempoh tidak melebihi lima belas (15) tahun dan juga boleh didenda tidak kurang daripada lima kali ganda jumlah atau nilai hasil daripada aktiviti haram atau peralatan kesalahan itu pada masa kesalahan itu dilakukan atau lima juta ringgit yang mana yang lebih tinggi.

KPDN telah melaksanakan OPS TIRIS 3.0 bermula 1 Januari 2024 bagi membanteras aktiviti penyelewengan dan ketirisan barang kawalan dan bersubsidi. Berdasarkan statistik penguatkuasaan bermula 1 Januari 2024 hingga 10 September 2024, sebanyak 30,846 pemeriksaan telah dilakukan di seluruh negara. Daripada jumlah itu, sebanyak 2,083 kes telah dihasilkan dengan jumlah nilai rampasan keseluruhan sebanyak RM80.73 juta. Seramai 511 individu juga telah ditahan dalam tempoh yang sama.

Bagi statistik berkaitan barang kawalan LPG bermula 1 Januari 2024 hingga 10 September 2024, sebanyak 143 kes telah dihasilkan di seluruh negara dengan nilai rampasan bagi LPG sahaja berjumlah RM745,144.70.

Orang ramai yang mempunyai sebarang maklumat berhubung aktiviti penyelewengan barang kawalan dan bersubsidi boleh menyalurkan aduan yang lengkap dan tepat kepada pihak Kementerian melalui saluran berikut:

- i. WhatsApp 019-848 8000;
- ii. Portal e-Aduan KPDM iaitu <http://eaduan.kpdm.gov.my>;
- iii. Call Centre 1-800-886-800; dan
- iv. Aplikasi Telefon Pintar Ez ADU KPDM.

DATUK AZMAN BIN ADAM
Ketua Pengarah Penguat Kuasa
Kementerian Perdagangan Dalam Negeri
dan Kos Sara Hidup

###